

四庫全書

史部

欽定四庫全書

史部

硃批諭旨卷二百十三之四

詳校官尚書臣德保

編修臣裴謙覆勘

總校官中書臣朱鈴

校對官監丞臣張曾炳

謄錄監生臣李錦

欽定四庫全書

硃批諭旨卷二百十三之四

硃批邁柱奏摺

雍正七年九月十七日湖廣總督臣邁柱謹

奏為謹繪新設永順府縣輿圖恭呈

御覽事竊照永保桑三土司地方荷蒙

皇恩改土歸流經臣題請

欽定永順一府轄屬永順龍山保靖桑植四縣其知府

以下各官亦經遴員調補奉有

俞旨現催赴任所有郡縣疆界臣謹恭繪輿圖進呈

御覽至永順協設兵八百名保靖營設兵四百名桑植

營設兵三百名俱已抽調到汛現在相度險易隘

口安塘設汛分派巡防棋布星羅務在嚴密圖內

未及細載俟安設妥協之後另行繪圖

進呈合并陳明伏祈

睿鑒謹

奏

應題者仍行具題母因既經摺奏遂不具疏題奏也此事目今原可不必

同日又

奏為覆奏

訓旨併繳

硃批原摺事竊臣前奏楚省被旱緣由一摺奉有

皇上御批臣跪讀之下悚惕愧赧自知秉質庸愚學識

淺陋未達

天人感應之理荷蒙

訓示使臣憬然覺悟今楚省雨澤愆期不克歲臻大有
向後但覺稍有水旱情形作速奏聞不可遲誤
皆臣奉職無狀所致臣惟有仰遵

聖訓倍加修省冀挽

天心於萬一耳再臣前奏田旻如逼逃川省粟穀壩田良
臣等一摺奉有

硃批今趙弘恩業已到任臣遵將

聖意密諭知之矣以上奉

批原摺二件理合恭繳謹

奏

知道了

同日又

奏為恭報湖北收成分數米價情形事竊查本年中
晚二禾收成分數先因屢催湖北藩司查報未到
業將湖南收數具摺先行奏

聞茲據布政使徐鼎將湖北八府一州收成米價分晰
開報前來臣謹另摺開呈

御覽外再查各屬雨暘調順一應黍稷麻豆雜糧俱獲
豐收即前此少雨之處補種蕎麥現今茂盛是以
民間米價甚平地方寧靜臣猶恐明年青黃不接
之時或有米價昂貴之處現行布政司於商捐買
穀銀內借支一萬二千兩委員赴衡寶荆襄等府
最熟之地買米運貯省城以備分發照原價減糶

之用賣出價值仍補原項合併陳明伏祈

睿鑒謹

奏

覽奏朕懷少慰湖北今年收成米價未料如是也

同日又

奏為覆奏事竊臣接到怡親王等寄字內開雍正七

年七月二十六日奉

上諭聞得從前發遣廣西人犯心懷怨望在外捏造悖

逆之言沿途布散查雍正四年十二月內發遣人犯
一名達色雍正五年三月內發遣人犯一名馬守柱
閏三月內發遣人犯一名蔡登科四月內發遣人犯
二名耿桑格六格太監一名吳守義五月內發遣太
監一名霍成以上七人俱係發往廣西之犯伊等既
捏流言則沿途解送之官員人等斷無不曾聞知之
理爾等可寄信與該督撫將從前曾經押解犯人之
人員一一查出確加詢問令其將各犯所捏悖逆之

語一一據實說出不許隱諱一字伊等係聞言之人毫無罪過不必畏懼代為隱瞞倘此時不肯據實說出將來嚴加究訊之時本犯自行供出及他處查出之後定將隱瞞之人從重治罪欽此遵

旨寄信前來總督可遵照即行辦理務須明白開導使伊等供吐實情等因到臣隨即欽遵密行北南按察司密提押解兵役明白開導使其供吐實情仍解候親詢去後除湖南已咨撫臣就近詢明具

奏外今據湖北臬司回稱遵經密提從前押解各犯之官兵人役逐一查詢僉供伊等各管解達色等七犯在途不過需要口糧人夫竝未聽有悖逆之語再四詰問俱各堅供實未聽聞等情前來臣覆加婉曲面詢與該司取供無異理合據實奏

聞仰祈

睿鑒謹

奏

奉朕諭旨特交事件如是草率奏覆甚屬慢忽可謂無能玷職之至湖南巡撫兩司革任之諭諒已知之矣汝等若仍前慢視不行研窮細詢斷乎不可旨到速速訊取信供具奏以聞

同日又

奏為謹陳湖南吏治情由仰祈

睿鑒事竊臣蒙

皇上殊恩畀以總督重任凜遵

訓旨首以察吏安民為務今湖北各屬經臣時加勸誡

恐未必然

吏治已覺可觀惟湖南遠隔重湖自司道以至守

令從不一至武昌勢不能耳提面愷切開導而

朕早

覺照訓飭者不啻一而再再而三其如下愚不移

何今

撫臣王國棟辦事雖極謹慎然馭下失之太寬按

數日

察使郭朝祚職司風紀而事多姑息務博忠厚之

欲言已無及矣名即如臣現在訪叅之武岡知州余光熨其諱賭

諱命穢蹟甚彰撫臣已有見聞業行按察司提審

而該州抗不詳解上司亦不揭叅則威令之不行

吏治之疲玩可類推矣再如辦解銅觔一項例委道府領價購辦原非苦難之事而湖南庚戌年上下二運各府互相推避及委定長寶岳常等四府知府輒具會詳以購辦為艱請開綏寧桂陽銅礦以資解運撫臣隨致商於臣思銅礦一開不肖匪徒蜂屯蟻聚恐致別生事端且楚南之礦時有是當之極朕甚嘉之時無烏合之衆易聚難散該府等止圖一己之便利而昧地方之大計由此觀之是湖南積習猶未

盡改除逐一密訪不肖劣員嚴叅示儆外臣再查

屬員之賢不肖總在上司之能否何如若王國棟在任
州縣倉庫例係知府盤查今湖南郡守彼此聯絡
保無上下相朦之弊以臣愚見若於北省賢能知
縱對調北省之員可保必無濟於事仍如舊耳趙弘
恩似一實心任事之人亦屬可取前任按察司時
頗覺風厲俟伊到任後汝等商酌而行
聞伏候

皇上訓示謹

奏

嘉悅覽焉

同日又

奏為據實奏

聞事竊據湖北按察使王肅章印稟內稱為道員擅擾
大典鄉闈關防不謹事伏查三年賓興乃

朝廷掄才大典闈中內外關防理應謹嚴以絕弊竇今
值楚省鄉闈之期有武昌道徐聚倫於八月二十
六日貢院晚鼓開門該道無端乘轎而入跟隨人

役一齊同至至公堂卷棚下監臨迎請邀坐該道
徑入監臨房內臨晚出院又二十七日早鼓該道
又至一切行儀與二十六日同監臨隨示開照得
科場理宜嚴肅京闈三場雖畢內外截然外省公
事煩多各屬稟商要務自當循例傳進但恐僕從
濫入必致漸滋弊竇今後如有緊要公務面商者
先令龍門官傳稟於至公堂公同相見管門各官
毋得任意放入致干察究等因在案本司職司風

紀事關道員擅擾大典鄉闈關防不謹斷不敢避
嫌徇隱并干

功令相應據實稟報等情併據提調糧道張廷樞監
試鹽道楊晏各稟同前由到臣查鄉試大典理
宜嚴肅武昌道徐聚倫無端直入貢院甚屬乖戾
而布政司徐鼎身任監臨優容含忍不即拒絕均
為不合臣本應據稟

題叅因兩員操守尚有可稱仰體

皇仁除各加訓飭倘仍無悛改自當據實叅處外緣據
司道具稟前來理合

奏明伏祈

睿鑒謹

奏

於汝奏未到之前業據徐鼎具摺陳奏或係防汝叅論
預為自潔地步亦未可定屬員類此失於檢點之過理
宜切加訓誡若仍不改悔放縱自恣則不可更為姑容

當叅處示懲令屬員各知慎畏也

雍正七年十月二十日湖廣總督臣邁柱謹

奏為奏

聞事竊照湖北中晚二禾收成分數經臣具摺

奏報內有興國孝感等七州縣入秋少雨現在委員
踏勘情形其分數未定業於摺內陳明今據布政
司詳據府縣勘明實有六分五分以上收成委不
成災出具並無諱匿印結前來臣覆加訪查無異

又現今雨暘及時麥苗繁盛米價甚平至於南北
堤壩伏秋兩汛江湖水勢平穩堤壩俱皆保固並
無漫決之患今當農隙之候臣現飭州縣及水利
各官督催糧戶各出夫土照例加增修築不敢怠
誤合併具摺奏

聞謹

奏

覽

據爾齋呈田畀如奏摺朕已備覽可向伊密宣朕諭其
既往之咎朕悉予寬貸向後當諸凡謹慎一一祇遵訓
諭而行奉公守法教養土民痛改從前土司陋習自然
子子孫孫永沐國恩也至伊摺內有恐乖法體伏祈敕
部議處等語當諭伊云此事係由該提督密摺奏聞竝
未經由部科朕原情恕宥即可暗銷之事毋庸照請敕
議如此詳細傳諭於伊可也

同日又

奏為備陳清查積欠情由仰祈

睿鑒事雍正七年十月十三日臣接到大學士公馬爾賽等寄到欽奉

上諭一道因徐鼎摺奏荆門州民間訛言清查必致加賦

命臣將楚省清查之事暫行停止欽此伏查上年十一月內蒙

皇上命臣兼理湖北湖南不清錢糧臣正在辦理間於

閏七月二十四日復准部咨條奏沔陽積欠宜逐戶挨查編造完欠清冊催徵一疏奉

旨命

臣

遴選賢員徹底清查辦理

臣

遵即委本管之荆

州道高起督率委員清查臣仍大張告示申明包攬侵食者速令自首准其分限清完免罪又念此項舊欠錢糧應有加一火耗乃舊任各官之養廉久已去任似可不給除每兩三分解充公項其餘耗羨七分槩行豁免以紓民力現今人心歡服首

者完者陸續而至一月之間已完銀五千餘兩是
委荊州道督率清查者止沔陽一州其餘俱令各
州縣辦理竝未另委今徐鼎忽奏荊州道督率委
員協辦有荊門州民訛言必致加賦紛紛求停等
語將委令該道清查沔陽之事而移作荊門殊屬
朦混且荊門州民訛言請停乃因徐鼎請行順莊
之故查本年四月內據徐鼎請行順莊之法力言
實為有益臣令先擇一二州縣試行至五月內又

據徐鼎具詳荊門州田糧請委效力人員徐成信
協同該州清理經臣批行嚴飭該員毋得藉端滋
擾在案及閏七月初旬臣訪聞荊門因順莊一事
赴州官環訴請停隨即密諭飭查嗣據荊門知州
蔣曰梅稟稱七月內州民因山田缺雨赴城遞詞
併請停止順莊卑職撫諭俟查勘分數如果成災
自當轉報其順莊門單亦當代請候示民各散去
等情臣查順莊一法恐有奉行不善隨經諭令暫

傳百姓亦帖然寧靜如果民不安安臣必先行入
奏何待彼言茲徐鼎膠執已見奏請

敕發人員以為順莊之用荷蒙

皇上聖明洞鑒以試用人員不曾諳練難委分查之責
將楚省清查之事暫行停止俟新撫到任之後與
臣悉心籌畫辦理等因臣查徐鼎請行順莊清查
田糧一事自應遵

旨暫停至臣現行分別役蝕民欠今其自首限完免罪

諸事當此收成之後正可催徵倘亦停止恐刁玩之衿役自必觀望不前伏懇

皇上允臣照前辦理庶無中阻之虞而積弊得以一清矣為此繕摺備陳伏乞

睿鑒謹

奏

此奏甚是另有旨諭部矣

雍正七年十月二十八日湖廣總督臣邁柱謹

奏為遵

旨覆奏併繳

硃批原摺事竊

臣

前奏達色等解役詢供一摺奉有

皇上御批臣捧讀之下惶恐無地此實愚昧疎忽咎無可辭荷蒙

皇上訓飭不即加罪

恩今補奏今臣覆加密詢取有信供另摺具

奏伏乞

睿鑒所有

硃批前摺附便恭繳謹

奏

楚省有邁柱王國棟如是督撫自應吏治不及他省事不如他人也朕實代汝抱慚總之一不誠則諸凡不可問矣

雍正七年十一月初八日湖廣總督臣邁柱謹

奏為請

旨事竊照湖北恩施縣知縣馬昉義患病難勝要缺臣

現經

題請休致所遺員缺乃施州衛併大田所新經改設之縣地處苗邊管轄十六土司非熟悉風土苗情者不克勝任今查有現任駐防桑植守備鈕正己前任大田所守禦千總歷任十餘年之久該員前因調考臣見其人甚是明白詢以苗地情形莫不諳悉且十六土司土民素相信服若以之改補恩

施縣知縣實係人地相宜但以守備改補知縣與
例不符未敢遽繕明疏臣從因地擇官起見特請
皇上訓示遵行謹

奏

照該督所請鈕正已補授恩施縣知縣該部知道

同日又

奏為請

旨事竊臣前奏副將張可才與叅將崔鼎互揭一摺蒙

欽定四庫全書

硃批諭旨

卷二百十三之四

十六

皇上硃批張可才准留楚省當於本內聲明請旨崔鼎
所揭既誣何可從寬按律處斷之後今其來京引見
欽此及臣審明崔鼎誣揭情由擬罪具

題奉

旨張可才著留湖廣交與邁柱遇有人地相當之缺題
請補授崔鼎著革職其杖流之罪從寬准其折贖該
部知道欽此部咨到臣轉行遵照在案除張可才留
楚俟有相當之缺

題補外查崔鼎現奉

明旨未有來京引

見字樣今應否俟其折贖之後咨送回籍抑或仍遵前
次

批諭給咨赴部引

見之處臣未敢擅便相應仰請

皇上批示遵行謹

奏

汝審觀崔鼎尚屬可惜人材則送部引見若係無知狂妄之輩咨回原籍可也

雍正七年十二月十五日湖廣總督臣邁柱謹

奏為恭謝

天恩事雍正七年十一月二十七日臣齎摺家人回楚

捧到

皇上賜臣哈密瓜二圓臣謹望

闕叩頭謝

恩祇領訖竊臣自愧庸材謬膺重任日凜素餐之懼時
懷茹藥之心屢沐

天恩特頒珍味茲復

賜臣哈密名瓜臣跪嘗之下感激難名仰沾
雨露之施永矢涓埃之報謹繕摺恭謝伏乞

皇上睿鑒謹

奏

覽奏代汝曷勝慚愧

同日又

奏為恭報楚省得雪情形事竊查楚省南北地方於
以手加額覽焉
十一月內連得大雪詢之壽農咸稱來歲二麥必

獲豐收之兆臣惟有躬自敬謹益加修省以期

天佑仰副

聖懷謹繕摺奏

聞謹

奏

大雪固屬佳兆但既為必獲豐收之狂言尚何敬謹修省之有耶

同日又

奏為覆奏事竊

臣

前奏清查沔陽積欠并陳布政使

徐鼎勝混情由一摺荷蒙

皇上睿鑒隨准部咨奉

旨命

臣

照常清查竝將徐鼎勝混之處交部察議欽此

臣

現在欽遵悉心清查據委查沔陽積欠之荊州

道高起稟稱多方宣布

皇仁減耗撫字勸令自首輸將閩州童叟歡呼其包侵等項先後已首出一萬三千餘兩而各方尚有未報者百姓樂於清查以免胥役包侵之累頂祝

聖恩遍於四野等語前來理合奏

聞謹

奏

高起之語何可盡信江南積欠始初亦如是奏聞卽係

沔陽前鑑須再體訪輿情更加詳慎切勿膠固文飾執
意強為一切事務朕但悉實情則不難裁奪所以諄諄
訓諭爾等不可絲毫欺隱也

同日又

奏為奏

聞事竊臣訪聞有江南人龍琯者帶有眷口寓居漢口
地方稱奉王差往廣東開山其形跡來歷不明隨
委標員會同府縣嚴查去後據漢陽府等獲到伊

子龍曹供稱伊父龍琯係江南望江縣人於本年
正月內蒙十三王爺叫往廣東開山已於十一月
初六日起身由長沙湘潭往廣等語臣查龍琯稱
奉王差恐有假冒情弊除飭地方官將伊家口收
管竝密咨湖南廣東撫臣迅行查拏嚴究是否假
冒外理合奏

聞伏祈

睿鑒謹

奏

怡親王寧有此事棍徒假冒何疑速宜嚴拏審究京城更有夥黨為伊線索亦未可知逐一徹底詰訊明白具奏以聞

同日又

奏為覆奏事竊查先據彭肇槐呈請留伊母弟在永緣由經臣摺奏奉有

硃批仰見

睿謨深遠措置咸宜

臣

即欽遵寫字差齎與彭肇槐委

曲開導使知

聖恩廣大令將母弟即速迎養併咨江南督臣飭催去

後今據彭肇槐回稟內稱肇槐獲邀

皇上高厚洪恩賞銀授職理應將嫡母生母併弟肇模等迎養任所同歸原籍伏乞飭令地方官曉示俾肇模等各將田產變價隨同原籍安插若愚昧遲留飭令遞解回籍等情到

臣

除行湖南布政司轉

行永順府遵照催令查明家口名數造冊請咨遞
送回籍外所有彭肇槐感激

天恩遵照令伊母弟回籍稟覆情由合先具摺奏

聞謹

奏

此等易於措置之事尚然籌慮不及何顏具此一奏耶

同日又

奏為奏

聞事竊臣前准大學士公馬爾賽等寄信欽奉

上諭緝拏大盜趙七等因欽此臣隨密諭按察司竝地方各官選差誠信能幹捕役懸賞暗行緝捕竝用密扎差役齎赴兩江督臣及江西撫臣知會一體密拏俾無漏網各去後臣又廣為探訪趙七實係江南積盜姓名不一居住靡定因面有疤痕人呼趙七疤子家住江南儀徵縣蕭公坊麻石橋又住龍門橋地方二年之前曾來湖廣此後又無踪跡

今臣現於南北兩省多方購緝除湖南獲到匪犯
鄒細徠仔供出趙七夥盜情由已經會同撫臣摺
奏外臣又訪得該犯曾到楚省團風鎮地方有巡檢
蔣基送至僧人紹裔廟內住過併雇蕭二划船乘
坐隨經密拏紹裔蕭二等訊據紹裔供雍正五年
三月蔣巡檢送一張五爺至廟住歇云係相好鄉
親常雇蕭二的船向鹽船上要鹽早去晚回常帶
四五十包鹽在鎮上賣錢使用因街隣說不是好

人不容他住五月內即雇蕭二的船往別處去了
這姓張的臉有一疤等語據蕭二供張五爺雇過
幾次船在沿江一帶遇有鹽船就去要鹽船上不
敢不給那年五月內雇小的船送至廣濟武穴地
方又轉雇巴斗船下去了等語據巡檢蔣基供雍
正五年三月有張五稱係同鄉來會巡檢要在鎮
暫住後聽見張五飲酒鬧嘴催他起身雇蕭二的
船去了等供臣查僧人紹裔所供狀貌則張五即

係趙七更名可知巡檢蔣基從前與之往來必知
現今下落除發按察司嚴行究審外臣仍各路訪
拏務期必獲不敢少怠合將現在情由具摺奏

聞再

臣

先於十月內風聞趙七逃往四川

臣

即飛差寄

信與四川撫

臣

憲德協同密拏去訖合併陳明謹

奏

正緣汝等庸平督撫訪緝無術不加慎密透漏消息致
令遠颺而乃推卸川省亦屬大可笑也地方上巨盜公

行上下官吏漫無知覺猶如聾瞽及朕將姓名示知又復混行傳播俾其聞風潛遁自豫解來盜犯至楚境內皆開鎖逸去是亦可謂能勝任之賢封疆大臣矣試一思之寧不少愧赧乎此二案盜犯若不就獲汝與范時繹尚何顏忝居此任耶

雍正八年二月初四日湖廣總督臣邁柱謹

奏為奏

聞事雍正八年二月初三日臣准湖南撫臣趙弘恩咨

開准廣東撫臣咨會恩平縣報獲姦徒李時英等
搜出令旗偽劄并供報夥黨等由恐有姦徒飄突
潛聚交通請飭接連兩粵各州縣一體嚴加防範
訪緝遇有踪跡可疑即行擒拏等因轉咨到臣隨
即飛飭界連兩粵各鎮協營密行防範并地方文
員一體嚴謹查拏如遇粵省姦徒飄突入境立即
擒捕毋使滋蔓外理合奏

聞伏祈

睿鑒臣謹

奏

詰姦緝匪乃封疆大吏之第一要務當不時留心稽查者何待粵省咨移而後飭行防範耶

同日又

奏為奏明事竊照永順保靖桑植等地方水陸道路類多崎嶇阻礙在昔土司於此恃為險固今蒙

皇上恩准改土歸流土衆俱入版圖自應修治平坦以

便往來臣於前歲已即檄行布政司辰沅道勘估
詳報嗣據該道王柔請於建治設營之後舉行在
案茲建設郡縣分布營汛規制已定文武各官俱
經赴任臣現催司道將陸路河道險仄之處作速
勘估興舉俟詳覆到日酌動公項銀兩給發地方
官逐一修濬悉為坦途俾舟楫通行輓運稱便謹
具摺

奏明伏祈

睿鑒謹

奏

此奏是應舉行者作速為之

同日又

奏竊臣接據沅靖等協探報黔省古州等寨兇苗反復無常現在用兵攻勦臣恐黔苗奔竄遁入楚境亦未可定即密札鎮筵鎮道併連界各協營暗為整頓以備逃竄竝令秘密勿致張揚如遇黔民奔

遁立行擒解若有向化投撫者好為安插並將本
管土苗加謹彈壓毋使驚懼外至鎮草六里紅苗
現今雖斂戢安靜然善後之圖應俟黔省古州大

所見是定之後容臣酌議另摺恭請

皇上訓旨臣於本年正月內因布政司楊永斌至省已
當與汝婿鄂爾泰密相籌計而行未有中肯綮者類
斯機務切須慎密辦理不可草率更勿張揚
撫戢毋滋事端臣惟仰遵

諭旨無分彼此以副

皇上綏靖邊疆至意謹

奏

覽

雍正八年三月十七日湖廣總督臣邁柱謹

奏竊照楚省南北各屬地方今年二月以來雨水霑足菜麥茂盛據湖北布政使徐鼎開報下米每石七錢五六分至八錢不等中米每石八錢四五分至九錢不等上米每石九錢六七分至一兩不等

湖南布政使楊永斌開報中米每石六錢至八錢
不等上米每石七錢至九錢不等雨水俱各霑足
二麥可望豐收等由到臣俟二麥成熟查明收成
分數另

奏外所有現在情形理合恭報仰祈

皇上睿鑒謹

奏

二麥必待登場後方可言豐收二字去春汝亦曾如此

具奏也惟當恪秉敬誠以迓

天庥毋稍肆志

雍正八年四月二十四日湖廣總督臣邁柱謹

奏為恭請

訓旨事竊照辦理六里紅苗事宜經臣會同撫臣趙弘

恩會摺具

奏現候

皇上指示但查武昌相距湖南道路遙遠一切機宜必

須就近調度方無往返遲誤且地里情形臣兩年
以來雖留心察訪而耳聞不如目見之確臣擬俟
湖北撫臣費金吾到任之後於八九月間輕裝減
從自備供給親至湖南督同文武各官悉心辦理
理合繕摺先請

訓旨伏候

皇上批示遵行謹

奏

湖南之行今歲且可不必湖北撫缺已調用魏廷珍矣
俟伊到任觀其心行於楚地宜否來年往詣亦不為遲
其間紅苗機宜倘有緊急辦理之件不妨仍令撫提二
臣會商調度也

同日又

奏為奏

聞事雍正八年四月初八日據湖北忠崗宣撫土司田
光祖詳稱為萬難容隱據實密陳事竊照職司附

近容美時遭田旻如侵凌暴虐俱已隱忍近來行
止愈乖謀為不軌新造鼓樓三層拱門三洞上設
龍鳳鼓景陽鐘門內鑿沼一道清流環繞名曰玉
帶河架石橋三拱名為月宮橋住居九重廳房五
重僭稱為九五居更於私垣建築觀星臺著令門
客異人晝夜登臺觀望星斗尤可異者本年正月
十五日密差太監一名侯有之至職司地方查取
脫回被拘女口時經舍目田邦華回報前來旋據

土婦韋氏稟稱伊子覃連於雍正二年被容美司
拏去改名三星割做太監適纔聽說現在宮內乞
恩取回等情又據土民庚生兒稟稱小的兒子田
玉美也被容美司拏去割做太監職司隨喚侯有
之查詢據供現在宮內伺候的太監有二三十箇
田玉美三星亦在其內等語似此種種不法揆其
動靜莫可測度職司切近其地不敢含默理合據
實密陳連太監侯有之差舍把田邦華解赴永順

協轉解院憲親訊等情并據永順副將楊凱差兵
同舍把等將淨身人侯有之押解到臣隨經密發
兩司會訊確供去後茲據該司等詢據侯有之供
稱小的等被割之人共有三十三箇那龍鳳樓景
陽鐘玉帶河月宮橋住房九重廳房五重都是實
的觀星臺在衙門傍邊有一姓徐的是荊州人時
常同司主上臺去看星兵馬數目我不知道有一
二百座礮并有烏鎗兵器盔甲等供回報前來臣

查土司田旻如從前僭越狂暴過惡多端蒙

皇上洪恩寬貸據伊自稱遵革從前積習倘雍正七年十二月以後有不奉公守法靜聽叅處等語今忠尚土司田光祖所詳旻如種種狂妄雖係已往之事但奉

恩宥之後將淨身之人仍復留用竝違制各項不即改除既據忠尚土司詳解前來難以姑息臣現在批司速飭旻如將淨身之三十餘人追出給親完聚

竝勒令將違制僭越之處立即改除仰體

皇仁開其自新之路倘敢抗違臣另具摺請

旨所有現在情由合先奏

聞謹

奏

此事若言已奏聞於朕則國法不容稍緩矣另有命大學士密傳之旨汝其遵奉施行可也

同日又

奏為恭謝

天恩併陳下悃事雍正八年四月十二日臣准部咨內
開武昌守道徐聚倫因武昌廠稅一事揭詳緣由

到臣臣跪讀

諭旨仰見

皇上至聖至明燭照隱微聚倫之肺肝一一

洞鑒而微臣之被誣得以自白重荷

天恩感深欲泣伏念臣猥以菲材蒙我

皇上不次拔擢畀以封疆重任一切事宜竭蹶辦理惟有據實秉公不敢稍存一毫欺飾之念至於大小屬員賢愚不一難得全備之人故凡有一善則加以獎勵有一過則為之訓飭竝不以私意為愛憎但受教者能自改悔而不肖者未免心懷怨懟如徐聚倫任性妄作不循規矩臣屢經面為教導諭以監司大員狂放之性氣不可縱浩蕩之

君恩不可負望其成全者意甚備至詎彼面雖唯諾而

含怨蓄怒橫肆誣讎計圖中傷且指臣為深險今
已蒙

皇上日月照臨臣心迹已明無庸贅辯惟是臣身任總
督不能約束屬吏感化愚頑致有徐聚倫敢以妄
誕不經之詞上干

天聽煩瀆

聖心臣實自愧自恥寤寐難安謹繕摺恭謝

天恩竝陳下悃仰祈

睿鑒至徐聚倫所詳張淑郿重戮收稅一案臣批兩司
會訊竝無婪贓入己實據臣恐有隱匿之情兩次
駁行嚴審詳叅尚未定案今遵

旨俟費金吾到任後確審會

題再武昌稅務臣於上年十二月恐張淑郿辦理不
善已另委漢陽府知府封元震接管

題明在案合併陳明謹

奏

張叔鄢官聲原屬平常即無婪贓欸蹟亦當另委更替

雍正八年五月十一日湖廣總督臣邁柱謹

奏為奏

聞事竊臣前奏二麥收成分數摺內聲明湖南收麥情
由未經遵照分晰行令逐細開報去後今據湖南
布政使楊永斌開報二麥收成山鄉素不產麥岳
州常德澧州三府州間有種麥之處岳州府屬收
成六分者十之四五分者十之六常德府屬七分

者十之三六分者十之三五分者十之四澧州七分者十之五六分者十之三五分者十之二各府屬米價每石中米七錢二三分起至八錢不等上米八錢四五分起至九錢一兩不等黃豆七錢四五分起至八九錢不等大麥五錢四五分起至六錢不等小麥八錢四五分起至九錢不等自正月至四月各府屬雨水霑足三四月之交雨水稍多衡永寶辰順郴靖等府州田地高阜雨水愈多愈

好惟岳州常德澧州長沙四府州所屬內間有地
處低窪不宜久雨而目下已值清明禾苗尚未大

礙理合具

奏伏祈

睿鑒謹

奏

覽

新補安陸府知府談九叙因其前在府任七年無過所

以用來但觀其才具似屬平常可留心試看果否優劣
何如具奏以聞

同日又

奏為恭繳

御批奏摺事竊臣前

奏棍徒龍琯假冒王差一摺奉

皇上硃批怡親王寧有此事棍徒假冒何疑速宜嚴拏
審究京城更有夥黨為伊線索亦未可知逐一徹底

詰訊明白具奏以聞欽此今此案已經撫臣趙弘恩
審明招擬具

題所有

硃批原摺并另摺共三件理合附便恭繳伏祈

睿鑒謹

奏

此案假冒情由已據趙弘恩審明題到矣

雍正八年九月初六日湖廣總督

臣邁柱謹

奏為請

旨事竊臣聞江南河東等省偶有被水之處已蒙

皇上發粟蠲租凡為民生計者無不周備然

皇恩有加無已將來隣省或有買米減糶之事臣思楚

地與豫省接壤而江南一帶長江可以順流而下

況楚省南北積穀甚多正在豫籌出陳易新之法

臣見本年南北兩省早晚二稻高下俱獲豐收擬

於此時先在湖北藩庫借支商捐竝耗羨公項內

酌量動銀五萬兩遴委賢員分往所屬最熟價平之處糴買新穀收貯俟隣省需米平糶即令彼省委員來楚照依楚省原買價費先儘倉貯之穀交買運回以濟民食仍將新穀補倉價銀還項如此則隣省無貴糶之虞而楚省又得出陳之益事屬兩便倘隣省不用則所買之穀留為楚省來春青黃不接之時照價平糶於民有濟但臣愚見未知當否伏請

皇上訓旨以便遵行謹

奏

據奏預糶新穀收貯候另有諭旨

雍正八年十月初九日湖廣總督

臣邁柱謹

奏為奏明事雍正八年十月初八日

臣准提

臣岳超

龍咨准貴州提臣咨移飛調楚省官兵一千五百

名前往貴州鎮遠古州彈壓今於湖北司局迅取

火藥六千觔鉛彈三千觔解赴行營應用等因

臣

即密行布政司照數給發委員星飛運送外臣查
湖南地方緊接黔省今撫臣趙弘恩現在遠出安
設六里塘汛所有赴黔兵馬一切供億督撫俱相
離寫遠文移往返恐致遲誤且長沙重地亦需大
員彈壓臣一面束裝減從以查勘岳常一帶堤埝
趙弘恩現經遠出此行是為由親往長沙就近調度理合

奏明再查湖北地方今年收成豐足民生樂業安靜
無事新任撫臣魏廷珍與臣共事三月見其辦事

遲鈍雖乏肆應果斷之才然為人謹飭現今地方
寧謐尚堪料理合併陳明伏祈

皇上睿鑒謹

奏

魏廷珍非乏肆應之才不肯致身為國耳將汝奏并朕
批諭於旋任時令伊知之

雍正八年十一月二十九日湖廣總督臣邁柱謹

奏為微臣戀

主情殷恭請

陛見以抒愚悃事竊臣一介庸愚荷蒙

皇上隆恩不次超擢畀以總督重任當楚省吏治疲玩
之後地方被潦之餘雖竭蹶駑駘愧無裨補顧念
三年以來一切事務俱蒙

皇上訓誨指示而久離

闕廷臣犬馬戀

主之心日深日切且地方情形有不能盡抒於章摺之

間必須面為陳奏者伏乞

皇上鑒臣微誠

允臣所請於來春二月容臣星馳赴京一覲

天顏恭承

聖訓臣曷勝懇切待

命之至謹

奏

汝且不必來京俟地方大員得人時方可魏廷珍朕實

信伊不及到此任後觀其如何奉職莅事始驗其居心之處耳

同日又

奏竊臣自長沙回署聞山東河南被水之民因楚米價平有攜挈眷口來至武昌漢口就食者臣現行署布政司確查人口數目每日給米一升小口五合膳至來春和暖再行資給口糧盤費送回原籍復業所有盤費銀兩容臣等酌量捐給其需用

米石俱於臣養廉銀買穀八千石之內動支正在
繕摺間又據黃州府稟報豫省饑民挈眷流入麻
城黃安羅田等縣而麻城鄉間尤多等情臣立即
行司委員運穀前往各該縣按口賑恤俟來春一
體咨送回籍或有續到者亦俱賑恤資送并一面
寄信與河東督臣田文鏡外臣現在實力辦理不
敢上煩

聖慮理合

奏明伏祈

皇上睿鑒謹

奏

覽奏就食災黎須加意撫卹務令得霑實惠不可徒托
空言竭力勉之或竟動撥倉糧或那公項辦理一面速
行一面奏聞

雍正八年十二月二十六日湖廣總督

臣邁柱湖

南巡撫

臣趙弘恩謹

奏為請

旨事竊照洞庭一湖綿亙八百餘里自岳州出湖以君
山為標準一望杳渺橫無際涯而舵桿洲居西湖
之中去湖之四岸或百餘里或二百餘里行舟至
此倘遇風濤陡作無地停泊亦無從拯救聽其傾
覆昔人曾經創議欲於此處建築石臺使商旅船
隻遇風遇夜可以灣泊奈此洲有名無體須從水
內立基工大費鉅事不果行今臣因往長沙自岳

渡湖悉其情形復又採訪輿論咸謂此工得成則一歲之中全活生命不可數計垂諸久遠利濟無窮臣隨與趙弘思面為酌議伏思我

皇上御極以來本天地好生之德建亙古未有之功凡於民生有益者在在

加恩今舵桿洲石臺工程實於民生有益臣等知之既確敢不上

聞業經委令衡永郴道許登瀛勘估須磊石為堤南北

兩面形同偃月長九十六丈寬三十丈高六丈仿
照江南水櫃之法下用長二丈之松椿密排需櫃
三十層外用石條靠櫃砌護五層每層高一丈二
尺用米汁油灰合縫其接縫處用鐵錠接連成片
以期永久約計估銀二十萬兩可以竣事所需銀
兩或照營田之例開捐應用或將鹽商每年報捐
銀內動支俟工竣之日核實用過數目請銷統祈
皇上睿裁倘蒙

俞允并乞

皇上特降諭旨或令臣等具題均候

聖恩批示遵行謹

奏

築臺之議候旨遵行

雍正九年二月初六日湖廣總督臣邁柱謹

奏為請

旨事竊照湖南醴陵桂東等十二州縣礦山經撫臣趙

弘恩

奏准創試現今撫臣委令衡永郴道許登瀛總理開採臣恐聚集人稠姦良混雜密飭地方武員稽查防範茲據道員許登瀛具詳桂東居楚極邊與粵省連界粵省窮民流入聚集地方滋事又米糧出產無幾恐價貴有妨民食等語臣現在批行藩司查議尚未覆到惟是桂東如此則貼近黔省之州縣可知目今黔省稿坪兇苗不法准到雲貴督臣

鄂爾泰咨會派兵協剿又黔省古州苗寨尚在用
兵臣愚以為湖南接壤貴州開礦似宜暫停俟黔
苗撫剿寧帖之後始行創試庶幾有益無患如果
臣言可採仰乞

皇上密諭撫臣遵照為此謹

奏

所奏是另有諭旨矣

同日又

奏為覆奏事竊臣前奏親往湖南摺內附陳撫臣魏
廷珍辦事遲鈍緣由蒙

皇上硃批魏廷珍非無才也不肯致身為國耳將汝奏
并朕批諭於旋任時令伊知之欽此今臣恭請

陛見摺內復蒙

硃批汝且不必來京俟地方大員得人時方可魏廷珍
朕實信伊不及到此任後觀其如何奉職莅事始驗
其居心之處耳欽此臣數月以來細觀撫臣之為人

行事性情偏執又復多疑一切案件往往瑣屑駁查遲久不結以致公務叢脞且地方事宜稍涉關係於己者並不擔當如山東等省饑民至楚時臣正在湖南是以司道稟知撫臣作何賑恤撫臣只云任他去罷不置一策迨臣回至岳州聞知其事即於舟次飛行布政司速加賑濟今又蒙

皇上恩諭留養并給資送回原籍幸獲安全撫臣之居心處事大率類此臣相晤時亦嘗規勸仍復漠然

臣謹據實奏

聞謹

奏

汝既與共事一方再加推誠勸勉看

同日又

奏為奏請試用武員事竊照楚省先蒙

皇上敕發試用武職人員今陸續已經委用

題補現無候試之人目今正需調遣仰懇

皇上棟發遊守各十員交臣委試以資臂指之用於地方營伍實有裨益伏祈

睿鑒謹

奏

候另旨諭部

雍正九年三月二十一日湖廣總督臣邁柱謹

奏為請

旨事竊照前署督臣傅敏條奏禁止漢民與苗人結親

已經部覆准行在案原因漢土攸分恐其姻親往來勾引生事亦防微杜漸之意今永順桑植保靖三土司地方已蒙

皇恩改土設流一府四縣布置周備即與中土無異自當聽其與兵民彼此結姻俾苗女嫁入民家可以習知事親敬長相夫治家之道民女嫁入苗家可以化導伯叔妯娌薰陶敦睦之風不便仍以蠻苗外之臣不揣愚昧以為土苗地方未經歸流者仍

遵例禁止外所有永順一府四縣請弛結姻之禁
似於新闢苗疆有益是否可採伏乞

皇上訓示遵行謹

奏

具疏題請遵旨施行

同日又

奏竊照六里頑苗於康熙四十九年勦撫之後名為
歸順而實梗化如故當時造冊報部應輸雜糧乾

州同知經徵一百二十一石零鳳凰營通判經徵
七十三石零係該管百戶收納然歷年以來半屬
空虛率以百戶之口糧抵算或官自捐賠不盡出
之苗戶今六里新經招撫安設營汛之始雖據辰
永靖道王柔以徵糧恐滋驚擾代捐七十二石似
非體制臣思我

皇上至仁育物在在加恩豈惜此一百九十餘石之苗
糧況永順改流之後已蒙

特恩蠲恤土民歡呼盈野則六里新撫之苗似應仰懇
聖慈一視同仁

特頒諭旨免徵三年以示

殊恩臣愚昧上陳伏祈

睿鑒謹

奏

所奏是另有諭旨由部頒發

同日又

奏竊惟洞庭為域內第一大湖風浪叵測出其途者
莫不恐懼咸有戒心今蒙

皇上聖明遠照

特發帑金二十萬兩於湖中舵桿洲建立石臺俾往來
舟楫得有避風灣泊之所保全生命此乃開闢以
來億萬年未有之舉自我

皇上創之由今而後千萬年不朽之功皆我

皇上成之臣仰承

德意親往相度又行據委理工程道員許登瀛逐一估計現在造冊繪圖覆核具

題至石臺之上臣又添估於東西兩面各建廟宇一所召僧住持又蓋營房二所撥兵居住守護并立高竿二枝日則張旗夜則懸燈使行舟遠望得有指歸又於南北兩面擬造店房數十間使貿易者居之出賣米薪以資過往商民食物合計所費據冊約費二十一萬餘兩臣飭管工官督率稽查尚

可節省以

皇上恩發銀二十萬兩似已敷足除一面分委官員採
買木石灰鐵等項豫備整齊俟秋間水落擇日興
工外所有微臣辦理緣由理合

奏明并繪建築石臺圖式恭呈

御覽謹

奏

覽奏并圖已悉萬壽宮無庸建造止立一碑亭可也餘

照議行

雍正九年四月初一日湖廣總督臣邁柱謹

奏竊照原永順土司彭肇槐之弟彭肇模等竝家口

應今回江西原籍臣咨兩江督臣飭催肇槐即速

遣人迎接并行湖南布政司查催去後因肇模等

以變賣房產為詞托故延挨今據布政使楊永斌

詳明估價八百八十二兩七錢於公項內墊給肇

模等俟召買有人收價還庫臣并於公項內給賞

盤費銀一百兩繕給咨牌委官將彭肇模彭肇楷
彭肇極并妻室子女僕婢及肇模等生母麥氏魯
氏向氏等護送前往江西撫臣轉行安插去訖止
有肇槐之母樊氏據稱年老不能起程又經咨催
兩江督臣勒令肇槐作速遣人迎養外所有彭肇
模等家口起押回籍緣由伏祈

睿鑒謹

奏

起押回籍固是但不可加以嚴迫宜再三訓飭屬員恐奉行不善將朕從前之恩施暨肇槐歸向之忠誠俱付之流水矣

同日又

奏竊照楚省南北民風刁悍動輒聚衆抗官今據安陸府鍾祥縣詳報該縣武生董建勲連年抗糧通詳褫革羈禁突有利河羅小兩鄉姦民約會抗糧如有私完拆屋罰錢糾衆於三月十六日聚於何

家集聲言至城圍署當即拏獲柳廷柱并聽約同
行之胡國士等十名據柳廷柱供報張東周龍定
一徐雲臣柳宗堯為首係董建勲唆撥抗官等情
臣即批司轉飭嚴拏未獲各犯究擬去後隨據報
已將張東周等拏獲其迫脅之人俱即散去臣現
行布按二司提犯審擬外理合將刁民脅衆抗糧
已經拏獲首犯情由繕摺奏

聞謹

奏

此等刁惡風習自當一一執法懲究尤貴平日不時訪察化導於早也

同日又

奏竊

臣

准戶部咨內開欽奉

上諭命湖廣督撫運米十萬石從水運送至商州此項米石應動何處存貯或於米賤之處採買或從荊州等處運至襄陽或竟從襄陽採辦或於南陽府淅川

相近之處採買粟米令邁柱田文鏡魏廷珍會同妥協定議等因到臣查湖北各府州縣分貯在倉有從前截留漕米易穀及裹漕米并動帑採買穀石可以碾米撥運十萬石之數臣一面檄行司道酌派數目星速碾米仍飛咨河東督臣田文鏡詢問南陽浙川有無粟米可以採買價值若干俟其覆到公同定議外臣思河南現需賑濟一經採買必致騰貴恐有不便於豫省今楚省既可足備十萬

石之米似可不必另買豫省粟米致費錢糧今現
飭各屬碾米陸續運赴襄陽并備船隻伺候載運
至豫但楚米一至浙川即須盤剝一至商州即須
上倉恐豫省船隻未能猝辦商州倉廩未能速竣
時當溪河水漲楚米到彼不便久停疎誤臣一面
飛咨豫陝兩省如已齊備即星速知會以便楚米
自襄起程庶無停船守候之慮俟咨覆到楚臣即
親至襄陽調度分派官員押運前行所有現在辦

理情由合先具

奏伏祈

睿鑒謹

奏

如此甚好候另有諭旨

雍正九年五月十二日湖廣總督臣邁柱謹

奏為請

旨事竊照楚省各標協營考拔千把總向係先送提督

考驗轉送總督覆考拔補微弁往返洞庭大湖不
無艱難險阻蒙

皇上軫恤鴻恩於雍正六年

特頒諭旨凡湖南營分由提督考拔不必又送總督湖
北營分徑送總督考拔不必復由提督俾微弁得免
涉湖之苦莫不感激

聖主曲體之恩惟是岳州城守水師二營雖隸湖南而
地方實在湖北與武昌接壤今考拔千把總呈送

提督衙門仍應渡湖而至常德不若武昌之近便
可否仰邀

皇上一視同仁將此二營改歸總督考補則

聖恩得以均霑臣謹奏請

訓示如蒙

俞允以便另疏具

題謹

奏

具疏奏請可也

雍正九年六月二十九日湖廣總督臣邁柱謹

奏為楚員仍請留楚補用以備任使事竊臣查有原

任江夏縣知縣鄒允煥任楚有年居官勤慎因丁

憂服闋現應赴部候選又原任黃岡縣知縣張光

裕年力富強才復幹練先因社穀一案被叅去任

嗣經審明開復繼因丁艱現在服滿例應赴部另

補臣思此二員者習知楚地民情與其用之於別

省莫若仰懇

聖慈准留楚省容臣遇有人地相宜之缺

題請補授似有裨益為此繕摺

奏請伏祈

睿鑒謹

奏

鄒允煥張光裕二員准照該督所請留楚補用該部知道

雍正九年七月十八日湖廣總督臣邁柱謹

奏為恭報楚省早稻豐收分數米糧價值仰慰

睿懷事竊照楚省南北今歲早禾茂盛雨水勻調經臣
先已

奏明茲催據湖北布政使徐本湖南布政使張璨將
各屬豐收分數查報前來臣查楚省本年雨水充
足江湖之水又不甚大是以高低田畝早稻俱有
收成合計十九八七分不等而十分九分者為多

即沔陽一州素稱水患者查勘亦有九分將來米價漸可日減惟長沙數處於五六月間價忽驟昂隨動積穀平糶并有新穀登場亦即平減所有各屬早稻收成分數臣謹另摺開呈

御覽謹

奏

全楚早稻收成以手加額覽焉

同日又

奏為奏

聞事竊查有原任翰林汪應銓者係江南鼎甲前曾經
過武昌臣未知其人亦未識其面今聞彼在湖南
停滯據衡永郴道許登瀛云係是伊表兄現留湖
南修志臣細訪汪應銓乃

聖祖仁皇帝斥革回籍之人理宜閉戶省愆不應遨遊外
省臣雖未悉應銓從前有何過犯但今現留楚南
理合奏

聞伏祈

睿鑒謹

奏

汪應銓乃係元年斥革者非有大干功令之處湖南修志亦屬無妨

雍正九年八月十七日湖廣總督臣邁柱登州鎮

總兵臣岳含奇謹

奏為奏

聞事竊照楚省豫備兵丁二千名赴陝一案臣先已欽遵整備候文起程間續蒙

皇上特令登州總兵岳含奇京營叅將邵銓同臣挑選藤牌五百名或一千名充入前挑馬兵二千名之數今臣等會同於前挑馬兵之內再加挑選出一千名又於湖北各鎮標營挑派藤牌兵丁一千名共合二千名之數至藤牌一千名之內多有兼善鳥鎗者據岳含奇文稱楚省鳥鎗操練精熟抑且

製造堅利以此調赴軍營必得實用請選烏鎗五百名充入藤牌數內等語現將臣捐製烏鎗五百桿給與藤牌兵丁之兼習烏鎗者使之兼施互用一兵可得兩兵之益至派撥將弁遵照先奉

諭旨派出臣標中軍副將徐啓新遠安營遊擊溫朝宰又臣原派興國營叅將高得伏彝陵鎮標遊擊姜端曾併千總八員把總十六員外所有各官兵

恩賞及幫給銀兩除先經給過備辦軍裝外俟起程之

日遵

旨從優給領以溥

皇恩其馬步兵丁騎馱馬匹併應支俸餉各項均行司
道豫為料理毋誤軍行臣等謹將挑選兵馬已經
齊備緣由先行具摺奏

聞候

旨起程謹

奏

據奏楚省豫備兵丁已料理整齊甚好知道了

雍正九年九月初八日湖廣總督臣邁柱謹

奏為恭報楚省中晚二禾豐收分數米糧價值仰慰

睿懷事竊照楚省南北二麥及早稻豐熟情由經臣節

次

奏報今中晚二禾又已收穫登場臣行據湖北布政

使徐本湖南布政使張璨各報豐收分數前來臣

復細查各屬收數十分豐足者居多米價現今日

減謹另繕清摺逐一開列恭呈

御覽謹

奏

據報楚省中晚二禾收成數朕不禁以手加額欣悅
覽焉

雍正九年十月十三日湖廣總督臣邁柱謹

奏竊臣接准領侍衛內大臣公豐盛額等寄字內開

雍正九年八月三十日奉

上諭副將冶大雄命往彝陵署理總兵官印務但思杜森之家口現在任所其總兵任內一分養廉恐不敷兩人家口之用著湖廣總督邁柱酌量通融添給俾兩人俱各足用仍將添給之項奏聞欽此遵

旨寄信前來等因到

臣

查彝陵總兵官杜森奉

命往川臣准部咨即行布政司將該鎮應得俸薪等項照例支給又念杜森備辦軍裝盤費在所必需復准豫支壬子年春夏兩季俸薪乾銀親丁等項併

此外再於公項內幫給銀四百兩以應該鎮赴川
之用至彝鎮原得養廉俱仍給杜森養贍家口具
署事副將冶大雄亦應給與親丁養廉之費臣酌
擬一年給銀八百兩加以俸乾心紅等項足資所
用此幫給冶大雄養廉銀兩查有武昌廠口岸錢
一項經臣

奏明聽為管關胥役飯食之用今除給與胥役之外
尚有盈餘充為公用應於此項之內支給謹遵

旨奏

聞再有鎮草總兵官周一德奉調為北路之用亦經照

周一德之缺朕經有旨命爾選員調補或行委署今所
辦理何乃錯謬至此
於署事之副將楊凱等均有本任養廉無庸另增

合併陳明伏祈

睿鑒謹

奏

覽

同日又

奏竊

臣

前遣

臣

子傅延

齋摺進京

仰請

皇上恩令赴陝於軍營差遣行走恭奉

諭旨留臣任所著實教導以望成人欽此臣跪讀之下

感激涕零仰見

皇上至仁育物不以傳延之駕鈍

命臣著實教導望其成人雖天地之生成未有委曲周

摯至於如此者也臣欽遵

聖訓日夕教導俾傳延用心習學冀得成就以圖報效

於將來臣謹率傳延望

闕叩首恭謝

天恩伏祈

睿鑒謹

奏

汝子無用之才甚屬庸碌所以令汝著實教導非望其

將來可以成就也汝竟錯會朕旨洵可謂人莫知其子之惡矣

雍正九年十二月初六日湖廣總督臣邁柱謹奏為請

旨事竊照湖北地方幅員廣濶處處險要需防而額設各標協營馬兵僅共一千七百六十三名步兵一萬五千六百五十名今派往陝西馬兵一千名藤牌兵丁一千名則通省馬兵僅存七百六十餘名

恐不足以資彈壓臣愚以為似宜另募壯健技勇
之人補足馬步二千之數以應操防俟赴陝原兵
凱旋回楚之日遇有事故兵缺陸續開除以符原
額庶地方無汎廣兵單之虞如果臣言可採恭請
皇上特頒諭旨或容臣另疏具

題伏乞

睿鑒批示遵行謹

奏

交辦理軍需大臣議奏

同日又

奏為奏

聞事竊照江西省行剗道府官署盜犯沈二楊金山二
名解至楚省楊店地方脫逃一案臣據縣營詳報
已即立限勒拏迨奉

嚴綸又復專差員役懸賞各路購捕業於上年十一月
內在陝西涇陽縣緝獲逃盜楊金山審明脫逃情

由具疏


題明并將楊金山解赴江西撫臣歸案審擬在案尚有沈二一犯臣委員四路追拏今於本年九月二十六日在廣東番禺縣地方擒獲經番禺縣審據沈二供認行劫江西道府官衙情實現今押解回楚除飭司轉解江西收審外所有逸盜沈二楊金山二名俱已全獲緣由理合

奏明伏祈

皇上睿鑒謹

奏

朕實代汝愧之逸盜雖經全獲功過何能相抵耶



硃批諭旨卷二百十三之四